



### Kluba programo:

#### Januaro:

- 7. LVS: Kultura programo: gvidos **Klaas Dijkstra**.
- 14. LVS: **Ivo Schenkel**: La Afrikansa: Esperanto de Sudafriko, aŭ Ido de la Nederlanda.
- 21. LEK: **Anna Löwenstein**: Kial plenkreskuloj legas Harry Potter?
- 28. LEK: **Jean Bosco Malanda**: Vivo en Kongo.

#### Februaro:

- 4. LVS: **Jean Marc Leclercq**: Okcitano, ĝiaj lingvo kaj kulturo.
- 11. LEK: **John Wells**: Lingva Seminario: verso, verŝo, versto; komenc(i)gi kaj fin(i)gi.
- 18. LEK: **Amri Wandel**: Ĉu ekzistas vivo sur la aliaj planedoj?
- 25. LVS: **Mikaelo Bronŝtejn**: "Mi stelojn jungis al revado".



### Lokoj, horaroj kaj aliaj informoj:

LEK kunvenas vendredvespere. La plejmulto de la kunvenoj estas virtualaj kaj okazas per la reta sistemo Zoom, komenciĝante je 19h (UTC). Fine de 2021, oni komencis okazigi kelkajn fizike ĉeestajn kunvenojn en la nova renkontiĝejo en Highbury. Pro la evoluo de la pandemio, oni decidis ke estas pli prudente plani la venontajn kunvenojn kiel nur interretajn. Se eblas okazigi kelkajn kunvenojn ankaŭ kiel ĉeestajn, la anoj estos informitaj kiel eble plej rapide.

Novaj spekturtoj de la Zoom-kunvenoj bonvolu peti ligilon al la proksim-vendreda renkontiĝo de la sekretario.  
**lek.sekretario@gmail.com.**

Haveblas ankaŭ, ĉe Jutubo, registraĵoj de prezentoj jam okazintaj. Bonvolu viziti **espinfo.org/lekran**

**Eblas nun aliĝi al la Brita Kongreso:  
22-24-an de aprilo 2022, Conwy, Kimrujo  
Britakongreso.org**



### Mesaĝo de la prezidanto:



Karaj LEK-anoj,

Mi komencis skribi mian lastan ĉijaran leteron la 15-an de Decembro - tre grava tago por ni ĉiuj. Ĉiun jaron en tiu tago ni haltas pormomente kaj pensas pri mirinda homo kaj pri lia donaco al la homaro. Tra la tuta mondo esperantistoj festas la Zamenhofan Tagon. Dum malfacila dua jaro de la pandemio ne ĉiuj povis kunveni fizike - sed la spirito de la festo sentiĝis ĉie. Zoom-aj kunvenoj, gratulaj mesaĝoj en sociaj retoj, telefonparoladoj kunigis homojn, kiuj iam en sia vivo faris gravan elekton: iĝi esperantisto kaj, tre ofte, iĝi membro de loka Esperanto-klubo.

Mi esperas, ke ĉiu leganto de la Bulteno trovos tempon por aliĝi au re-aliĝi al la klubo pensante ankaŭ pri sia propra kontribuo al ĝia prospero kaj progreso de Esperanto en Londono kaj tra la tuta mondo.

La klubo bone funkciis en 2021 en amika kaj inspira kunlaboro kun la Antverpena "Verda Stelo". Ĝi provizis klubanojn per interesa kaj varia programo ĉiuvendrede. Dankon al la kompilantoj de la programo!

Niaj instruistoj laboris kun novaj adeptoj de la lingvo. Espereble multaj el ili aliĝos al la klubo kaj alportos "novan sangon". Ja ni tiom bezonas novajn ideojn kaj talentojn!

Niaj klubanoj Anna kaj Ian tre sukcese prelegis al neesperantista publiko. Pli da tiaj prelegoj de spertaj prelegantoj bonvenas! Dank'al kunlaboro inter LEK-anoj kaj la kuratoroj en la Brita Biblioteko aperis tre bona gasta blogo de Giuliano Turone pri Dante kaj Esperanto. Vere inda kontribuo al Zamenhofa Tago kaj informado pri gravaj tradukoj en Esperanton!

Trovi esperantistojn en Londono kaj informojn pri Esperanto nun pli facilas dank'al kreskanta enreta videbleco de LEK. Nia reta paĝaro kreskas. Aldonoj (historio kaj fotoj) tre bonvenas. Nia paĝo en Facebook altiras pli da trarigardoj kaj komentoj nun. Kaj nia nur dumonata 'pepila' konto 'Londono Vokas' ĵus ekhavis sian 100-an sekvanton.

Vi ricevos ĉi tiun Bultenon en la nova jaro. Estu ĝi feliĉa kaj prospera al ĉiuj LEK-anoj kaj membroj de viaj familioj. Bonvolu pensi ankaŭ pri tio, ke en 2023 la klubo festos sian 120-jariĝon. Kiel ni festu?

Mi mem havas etan personan projekton: trovi ĉiujn lokojn en kiuj dum sia tuta historio kunvenis LEK kaj fari fotojn de tiuj lokoj. Eble en 2023 ni faru nian tradician someran promenon tra tiuj lokoj kaj tiumaniere omaĝu al niaj antaŭuloj?

Kaj kiun planon havas vi? Mi esperas ke aperos novaj brilaj ideoj por inda festado.

Mi finas mian leteron la 17-an de Decembro, tuj post la bonega vespero kun Georgo Handzlik. Dum ni auskultis la kanton de Georgo omaĝe al la Majstro, *Londono Vokas* ekhavis sian 100-an sekvanton. Li estas Sebastian Schulman, tradukisto el la jida kaj Esperanto. Ĉu ne miraklo?

Sanon kaj korean energion al ĉiuj en jaro 2022!

Amike  
**Olga Kerziouk**

## Londono instruas Esperanton al la mondo sed apenaŭ al Londono

Ekzistas io, kies nomo estas Londona Kursaro. Oni administras ĝin per la retaj paĝoj de la Londona Klubo kaj oni plenumas la lecionojn per Zoom. Se vi interesiĝas pri la detaloj, la administra sistemo liveras al vi ion tian:

John	A1-A2 Beginners course Tuesday	12
Anthony	A1-A2 Beginners course Thursday	10
Anna	A1-A2 Grammar sessions Saturday	20
Phil	A1-B2 Reading course Tuesday	8
Pawel	B1-B2 KER exam prep course	10
Renato	B2 Intermediate course Tuesday	10
Peter	B2 Intermediate course Tuesday	10
Renato	B2 Interm. course Asia Saturday	10
Anna	C1 Advanced course Wednesday	12
Phil	A2-C1 Writing course by email	6
Maurizio	A2-C1 Conversation Saturday	15

La lasta kolumno estas la plej grava, ĉar ĝi diras la nombron de la lernantoj. Estas variaĵoj de unu semajno al la alia, sed meznombre temas pri 100 lernantoj. La kursaro ekfunkciis, kiam ekaperis la viruso kaj la neebleco renkontiĝi persone (komence de 2020) kaj ĝi daŭras ĝis nun. Ĝi trovis siajn unuajn lernantojn inter la kursanoj de Norda Londono sed poste inter la retaj lernantoj de Duolingo. Laŭgrade la lernantaro vastiĝis geografie de Kalifornio al Japanujo, sed proporcie la londonanoj estas tre malgranda parto, ĉirkaŭ 10. Nun la defio estas trovi pli da londonaj lernantoj, se la Londona Kursaro volas utili al la Londona Klubo.

[londonaesperantoklubo.com/OnlineEsperantoCourses.html](http://londonaesperantoklubo.com/OnlineEsperantoCourses.html)

**Renato Corsetti**

## Du LEK-anoj lastatempe prelegis al eksteruloj pri nia lingvo.

Ricevinte informon pri la intenco rekomenci ek de Novembro ĉeestajn kunvenojn de LEK, klubano Ian Fantom raportis per jenaj vortoj propran sperton de tia rekomenco:

*“Ni rekomencis niajn kunvenojn de Keep Talking en Londono en julio, iom eksperimente. Tiukaze mi mem prelegis, kaj mi ne sciis kiom da homoj venos, nek ĉu ili volas aŭskulti prelegon pri la lingva flanko de propagando, ĉu estos intervenoj de la samaj politikaj huliganoj kiuj fermis pli fruajn kunvenojn niajn. Sed ĉio iris bonege, kaj la ĉeestantoj entuziasme akceptis mian temon, en kiu mi demonstris la bezonon por Esperanto. Nun ni ricevas regule preskaŭ duoble la nombron de ĉeestantoj kiom ni ricevis antaŭ la amaskvaranteno.”*

Responde al invito fare de Mirthy ([mirthy.co.uk](http://mirthy.co.uk)) Anna Löwenstein prelegis pri Esperanto, en la 15a de oktobro per Zoom. Jen kiel la organizo interrete antaŭanoncis ŝian prezenton – originale per angla lingvo, sed ĉi tie tradukita al Esperanto:

*“Ĉu Esperanto, lingvo kiun oni kreis antaŭ iomete pli ol 130 jaroj, vere povas esti tiel riĉa kaj esprimiva kiel lingvo nature evoluinta trans jarcentoj? Ĉu ajna lingvo per kio eblas krei poezion, literaturon sciencan kaj konversacion neformalan, povas esti ankaŭ facile lernebla? En sia prelego*

*Anna Löwenstein skizos la fonon kaj hodiaŭan staton de ĉi tiu fascina lingvo, mencias kialojn, pro kiuj oni ĝin uzu, kaj koncize informos pri ĝiaj gramatiko kaj sistemo de vort-farado.”*

Al membroj de Mirthy oni krome prezentis la prelegonton kiel aŭtoron de tri romanoj kaj de multaj verkoj malpli longaj, kaj kiel fondinton kaj redaktanton de porkomencanta retejo *uea.facila*.

El tiuj du gratulindaj iniciatoj la Esperanto-movado espereble gajnos ne nur prestiĝon sed ankaŭ kelkajn novajn membrojn. Se iuj tiaj poste aliĝos al LEK, des pli ĝojige!

**Terry Page**

## Omikrono estas ĝena sed ĝi ne estas Omego

Karaj klubanoj, vi certe konstatis, ke la konsilantaro sukcesis trovi novan kunvenejon kaj eĉ sukcesis aranĝi personan kunvenon tie en novembro. SED alvenis Omikrono, la nova variaĵo, kaj pro ĝi la novaj registaraj reguloj, laŭ kiuj aranĝi personajn renkontiĝojn fariĝis denove maloportune. Pro tio, laŭ la nunaj antaŭvidebloj, almenaŭ dum januaro kaj februaro ne eblas renkontiĝi persone kaj ni estos devigataj renkontiĝi per komputila vid-programo kaj atente sekvi la evoluon de la situacio.

Sed Omikrono = malgranda O ne estas Omego = granda O, la fina litero de la greka alfabeto. La londona klubo, kiu funkciis ankaŭ dum la bombado de Londono en la 2-a mondmilito, certe ne timas virusojn ankaŭ ne kun grekaj nomoj, kaj ni nun plufunkcias kiel eblas kaj fine renkontiĝos persone.

**La sekretario por la konsilantaro**

## Novajo(j) de EAB

Revuo-abonoj por 2022 kaj aliĝilo por la Brita Kongreso 2022 en Conwy ([britakongreso.org](http://britakongreso.org)) nun troveblas en la retbutiko de EAB, kune kun plena katalogo de varoj. La nova butikon (malkiel la antaŭa) prezentas pli ampleksajn priskribojn kaj detalojn pri la varoj, kaj en la angla kaj en Esperanto. (Pretigi tiom da priskriboj ambaŭlingvaj okupis min dum kelkaj monatoj!) Individua ero nun povas havi plurajn bildojn, kiu helpas prezenti la buntajn desegnojn el la plej lastaj infanlibroj, kiujn EAB eldonas. Se aĉetonto uzas poŝtelefonon por rigardi la butikon, la paĝo aŭtomate rearanĝas sin por la eta ekrano.

Do, vizitu [esperanto.org.uk](http://esperanto.org.uk), elektu ‘shop/butiko’, kaj butikumu!

**Vilĉjo Walker**

## Londona Esperanto-klubo



## Funkciuloj

Honora Prezidanto: Prof. John Wells; Honoraj Vicprezidantoj: Heleno Fantom, Joyce Bunting. Konsilantaro: Olga Kerziouk (Prezidanto), Anthony Bodineau (Vicprezidanto), Matt Peperell (Vicprezidanto), Renato Corsetti (Sekretario kaj Programo), Arturo Prent (Kasisto), Anica Page (Registristo), Antony Rawlinson, Phil Housley, Terry Page. Maurizio Giacometto (Kompilisto de la Bulteno)